

REGLUGERÐ

um gagnaöflun og rannsóknir á sviði ferðamála.

1. gr. Gildissvið.

Reglugerð þessi gildir um alla öflun, miðlun og úrvinnslu upplýsinga, þar á meðal kannana, sem Ferðamálastofa annast. Reglugerðin gildir jafnframt um þær rannsóknir á sviði ferðamála sem framkvæmdar eru samkvæmt rannsóknáætlun Ferðamálastofu sem unnin er í samstarfi við rannsóknastofnanir, háskóla og atvinnugreinina.

2. gr. Hlutverk Ferðamálastofu.

Ferðamálastofa skal fylgjast með og stuðla að þróun ferðaþjónustu sem mikilvægrar og sjálfbærrar grunnstoðar í íslensku samfélagi að teknu tilliti til þolmarka íslenskrar náttúru og samfélags, ásamt því að vinna að samræmingu, greiningum, gagnaöflun og rannsóknum í ferðaþjónustu með hliðsjón af stefnu stjórnvalda.

Ferðamálastofa skal annast öflun, miðlun og úrvinnslu upplýsinga, þar á meðal tölfræðilegra gagna og annarra upplýsinga á málefnasviði stofnunarinnar á grunni þarfagreiningar, sem tekur mið af stefnumótun stjórnvalda. Gögnin skulu nýtast við ákvarðanatöku og markmiðasetningu í greininni. Við þarfagreininguna skal Ferðamálastofa hafa reglulegt samráð við atvinnuvega- og nýsköpunarráðuneytið sem og hagaðila á sviði ferðaþjónustu.

Ferðamálastofa skal jafnframt stuðla að rannsóknum á sviði ferðamála og vinna áætlun í samstarfi við hagaðila í ferðaþjónustu þar sem rannsóknarþörf og forgangsörðun verkefna er skilgreind, sbr. 7. og 8. gr. Ferðamálastofa lætur framkvæma rannsóknir skv. rannsóknáætlun í samræmi við lög og reglur þar að lútandi, m.a. hvað varðar opinber innkaup.

3. gr. Skilgreiningar.

Í reglugerð þessari er merking eftirfarandi hugtaka sem hér segir:

- a. Gagnaöflun: Töluleg gögn, sem safnað er með skipulegum og reglubundnum hætti með fyrirfram skilgreindum spurningum um ákveðið tímabil þannig að þær myndi óbrotna tímalínu.
- b. Rannsóknir: Öll úrvinnsla, miðlun og framsetning gagna og upplýsinga sem framkvæmd er í þeim tilgangi að nýtast stjórnvöldum til töku stefnumótandi ákvarðana á sviði ferðamála.
- c. Rannsóknáætlun: Áætlun til lengri og skemmri tíma um þau gögn sem stjórnvöldum eru nauðsynleg til að taka stefnumótandi ákvarðanir um uppbyggingu og þróun ferðaþjónustu sem atvinnugreinar með sjálfbærni hennar að leiðarljósi.
- d. Mælaborð ferðaþjónustunnar: Þróunarverkefni þar sem upplýsingar, gögn og kannanir tengdar ferðaþjónustu eru birtar á vefsíðu á myndrænan og aðgengilegan hátt.

4. gr. Mælaborð ferðaþjónustunnar.

Ferðamálastofa hefur umsjón með Mælaborði ferðaþjónustunnar.

Ferðamálastofa skal setja fram áætlun um áframhaldandi þróun Mælaborðs ferðaþjónustunnar í samráði við fagráð sem stofnunin og atvinnuvega- og nýsköpunarráðuneytið kalla saman.

5. gr. Miðlun upplýsinga og greining gagna.

Ferðamálastofa skal miðla upplýsingum um helstu niðurstöður kannana, rannsókna og gagnaöflunar eins fljótt og auðið er eftir að þeim lýkur með birtingu tilkynninga á vefsíðu sinni þar sem niðurstöður eru greindar og settar í samhengi við þróun ferðaþjónustunnar. Þá skal Ferðamálastofa gera niðurstöður gagna aðgengilegar í Mælaborði ferðaþjónustunnar á sama tíma. Ferðamálastofa skal jafnframt stuðla að því að fyrirliggjandi upplýsingar frá öðrum hagaðilum sem snúa að ferðaþjónustu og hafa þýðingu fyrir þróun hennar séu birtar í Mælaborði ferðaþjónustunnar.

6. gr. Birtingaráætlun.

Ferðamálastofa skal setja fram birtingaráætlun árlega. Hana skal uppfæra miðað við framgang verkefna og niðurstöður þeirra.

7. gr. Rannsóknáætlun.

Ferðamálastofa skal vinna rannsóknáætlun í samstarfi við rannsóknastofnanir á sviði ferðamála, háskóla sem sinna kennslu og rannsóknum á sviði ferðamálafræði og samtök atvinnurekenda á sviði ferðaþjónustu með hliðsjón af stefnumótun stjórnvalda eins og hún birtist á hverjum tíma og þeim fjármunum sem til ráðstöfunar eru hverju sinni.

Áætlunin skal unnin til þriggja ára í senn og endurskoðuð árlega eða oftár ef nauðsyn krefur.

Í rannsóknáætlun skal rannsóknþörf á sviði ferðamála skilgreind og könnunum og verkefnum tengdum gagnaöflun forgangsraðað. Rannsóknir sem byggja á fyrirliggjandi gögnum skulu að jafnaði hafa forgang fram yfir vísindarannsóknir sem byggja á grunnrannsóknum.

Í áætluninni skal gætt jafnvægis milli hinna þriggja þátta sjálfbærni, þ.e. efnahagslegra þátta, umhverfislegra þátta og samfélagslegra þátta, þannig að við gagnaöflun og rannsóknir sem nýtast við ákvarðanatöku og stefnumótun stjórnvalda sé horft til allra þáttanna.

8. gr. Stýrihópur.

Við vinnu rannsóknáætlunar skal Ferðamálastofa kalla saman stýrihóp sem í eiga sæti, auk fulltrúa stofnunarinnar, þrír fulltrúar háskóla sem sinna kennslu og rannsóknum á sviði ferðamálafræði, einn fulltrúi Sambands íslenskra sveitarfélaga og einn fulltrúi samtaka atvinnurekenda á sviði ferðaþjónustu. Fulltrúi atvinnuvega- og nýsköpunarráðuneytis skal jafnframt eiga sæti í ráðinu og stýra fundum þess.

Stýrihópurinn skal greina og meta hvaða gagna skuli aflað sem styðja við stefnumótun stjórnvalda í ferðaþjónustu og gera tillögu um verklag við gagnaöflun og úthlutun fjármuna.

9. gr. Gildistaka.

Reglugerð þessi, sem sett er samkvæmt heimild í 3. mgr. 3. gr. og 2. mgr. 12. gr. laga um Ferðamálastofu, nr. 96/2018, öðlast þegar gildi.

Atvinnuvega- og nýsköpunarráðuneytinu, xx.xx.2019